

Akta Keselamatan Dalam Negeri:

Dr. M nafi salahguna kuasa

KUALA LUMPUR, Jumaat — Kerajaan Barisan Nasional — sebelumnya Perikatan — tidak pernah menyalahgunakan kuasa Akta Keselamatan Dalam Negeri (ISA), tegas Timbalan Perdana Menteri, Datuk Seri Dr. Mahathir Mohamad di Dewan Rakyat petang ini.

Katanya: "Ini dapat dibuktikan dalam pilihanraya. Kami dipilih semula."

Perkara ini disentuh ketika menjawab soalan tambahan Encik Wan Mohd. Najib Wan Mohamad (BN-Pasir Putih).

Menjawab soalan asal dari Fyick Lim Kit Siong (DAP-Petaling), Datuk Seri Dr. Mahathir menegaskan, Kerajaan tidak berniat hendak meminda ISA 1960 sebagaimana yang dicadangkan oleh ahli pembangkang itu.

Encik Lim bertanya sama ada Kerajaan akan menimbang untuk meminda ISA untuk meletakkan kuasa-kuasa yang dipunyai oleh menteri mengenai tabanan di bawah Akta itu kepada penyeliaan dan pengawalan pihak kehakiman bagi menentukan tidak berlaku sebarang penyalahgunaan kuasa untuk tujuan politik atau lain-lain tujuan yang tidak mempunyai kaitan langsung dengan keselamatan negara.

Timbalan Perdana Menteri menjelaskan tanggungjawab menteri dan tanggungjawab kehakiman berbeza.

Katanya, kuasa di bawah Akta tersebut ialah kuasa eksekutif yang dipertanggungjawabkan kepada menteri.

Kerajaan tidak menentang jaminan secara undang-undang terhadap penyalahgunaan kuasa, katanya.

Tepukan

Datuk Seri Dr. Mahathir menegaskan, undang-undang yang ada sekarang mencukupi.

"Jika rakyat berpendapat Kerajaan menyalahgunakan kuasa, proses demokrasi dapat menamatkan perbuatan ini," ujar beliau.

Tetapi, tambah beliau, rakyat tentulah faham bahawa mereka yang begitu sekali mengancam penyalahgunaan kuasa di waktu mereka tidak berkuasa biasanya lebih berkuasa jika mereka dapat berkuasa.

Ini dapat dilihat di mana-mana saja, katanya, diikuti dengan tepukan gemuruh ahli-ahli Dewan.

"Yang Berhormat tentu tahu, bukan semua jenayah mempunyai bukti yang cukup yang boleh disahkan dalam mahkamah," katanya.

"Dalam soal keselamatan negara, kita bukan saja perlu menghukum mereka yang sudah melakukan kesalahan, tetapi kita perlu menghaiang perbuatan yang mengancam negara," tegas beliau.

Ini bermakna tindakan mencegah perlu diambil sebelum sesuatu perbuatan, katanya.

"Bagaimanakah dapat kita mengadakan maklumat kalau kesalahan belum dilakukan?" tanya beliau. Sebaliknya, tambahnya, jika ditunggu hingga kesalahan dilakukan mungkin agak teralalu lewat untuk memulihkan keadaan keselamatan.

No Siri 2226

No. Penerimaan 402/82

Bahan asal dari Arkib
Negara Malaysia